

淮軍平捻記

淮軍平捻記卷八

七年正月西捻張總愚突竄畿南

詔公督部入直援剿二十四日鼎軍敗賊於饒陽公復建就地圍制之議 自五年九月十一日張逆與任賴分股張總愚自中牟南竄許州爲江蘇臬司劉秉璋所敗卽西竄襄郟由山路犯汝州自洛河南岸折竄龍門白沙掠宜陽永甯曾公命湘軍劉松山一軍躡之而西賊不能停足由韓城鎮竄陝州未能渡河因自靈寶闖鄉馳入陝此西捻之所昉也至十月中張逆大擾渭南尹家衛等處遂入南山犯

藍田窺漢中十二月犯臨潼縣之交口兩金鎮渡渭屯踞
關山鎮豫讓橋一帶將圖渡同朝時晉省有臬司陳湜督
軍防剿秦省有劉松山張錫鏢李祥和等軍尾追前扼後
攻賊不得逞適獬逆犯順秦中擾亂而陝西巡撫劉公蓉
所部戰敗張總愚因乘機直趨西安省城戒嚴六年正月
劉松山張錫鏢等率兵趨援與賊鏖戰累日編修張錫鏢
陣亡劉松山力戰獲勝賊遂少退由鄠縣西竄墊屋因度
渭至扶岐劉松山躡追而西無戰不捷迭克銀渠金渠臨
平等鎮賊寨並大小堡寨百餘處三月十五日擒獬悉由

武功東竄劉松山會同黃鼎安住等軍折由大北溝赴興
平截剿自十七日至四月初二日各軍進逼併力追戰賊
死傷甚眾又奪回村堡十餘處賊遂由蒲城飛竄同朝一
帶時陳湜督軍嚴守禹門以上閩鄉一帶又有豫軍馬德
昭駐紮老河口河水正漲賊無可飛渡而黃鼎安住郭寶
昌劉松山等軍轉戰相逼賊既不能休息東西奔竄賊勢
之不能久踞關內者以此是時

欽差大臣陝甘總督一等恪靖伯左公宗棠奉

命入關剿賊各軍聲勢更壯至四月二十四日劉松山復敗之於

元其寨穀祿莊追至省城南山門口斃賊三千餘名生擒頭目及悍逆八百餘人奪獲騾馬一千五百餘匹五月初一日又敗之鄆縣少義防遂由鹽屋橫出郭公祠竄渡渭北桑家莊一帶奔竄渭河南北往來鄆杜之交窺晉不遂回豫未能賊之狡謀漸輯矣夏秋間河南巡撫李公鶴年自許州移軍杞縣左公宗棠由潼關進剿甘肅臬司劉典取道商雒入秦湖北巡撫曾公國荃檄提督姜玉順以所部扼紫荊子關張逆由尹家衛一帶復擾近華州李公鶴年檄馬德昭段廣瀛分駐閬鄉與姜玉順聯絡聲勢賊遂

急趨北向竄陷綏德分擾米脂以十一月二十二日由龍王廟乘河冰凍合呼嘯過河犯山西之吉州鄉甯諸處平蒲並警豫撫檄馬德昭一軍渡河援守運城急調張曜宋慶兩軍回豫而賊已由絳州曲沃垣曲山僻小路竄近豫疆十二月初九日過邵原關竄濟源縣及河內武陟溫孟獲嘉輝縣新鄉原武各境浸有內犯

畿輔之勢時自秦追躡之師則有廣東陸路提督劉松山安徽壽春鎮總兵郭寶昌自陝西移繞直境進剿之師則有陝甘總督左公宗棠親督各軍直隸備禦之師則有大學

士署直隸總督官文公親督各軍及都統春壽頭等侍衛
陳國瑞天津備禦之師則有三口通商大臣崇厚公所派
洋槍隊及天津練勇

詔促公內援並飭催劉銘傳善慶溫德勒克西馬步各營迅赴河
北進剿銘傳值傷疾驟發不能乘騎請三月假未滿溫德
勒克西善慶各有馬隊千餘員名然皆出征十餘年疲病
思歸久無鬥志公愷切獎勵勉以大義又以其所部太單
無步隊依護不能專當一面乃檄調總兵周盛波周盛傳
等馬步十一營並添鼎新之鼎字全軍與善慶溫德勒克

西馬隊由東阿進發並督催楊鼎勛郭松林繼進公擇要
布置後路各事刻日親行而賊騎飈疾一日夜奔馳二三
百里正月遂由磁州廣平直犯順德雞澤平鄉鉅鹿隆平
各處

畿南震擾公疏陳辦流寇以堅壁清野爲上策嘉慶初年川
楚教匪辦理十數年卒賴此以收功卽任賴捻股流竄中
原數省畏圩寨甚於畏兵豫東淮北民風强悍被害已久
遂漸添築圩寨深溝高壘到處與城池相等是以捻逆一
過卽走不能久停肆擾近年惟湖北陝西被擾最甚以素

無圩寨籌辦不及賊得盤旋飽掠其勢愈張直晉向無捻
患民氣尤爲樸懦未能築寨自守張總愚本極狡猾又係
窮寇南有黃河之阻必致縱橫馳突無處不流百姓驚徒
蹂躪詎有已時徒深浩歎且

畿疆河北平原曠野古稱四戰之地無險可守辦流賊與辦
守城踞寨之賊情形迥異流賊專于避兵守此則竄彼迎
左則趨右交臂旋失情勢使然非盡兵將之不力也聞該
逆自竄陝西北山後渡黃入晉沿途擄獲騾馬愈眾步賊
多改爲騎我軍騎少步多卽騎兵每人不過一馬追逐病

斃卽已無馬視賊匪每人可二三騎隨地擄添情形則又迥異自古辨賊必以彼此強弱饑飽爲定衡賊未必強於官軍但彼馬多而我馬少自有不相及之勢彼可隨地擄糧我須隨地購糧賊常飽而兵常饑又有不能及之理今欲絕賊糧斷賊馬惟有苦勸嚴諭直隸山西河北紳民趕緊堅築圩寨一有警信收糧草牲畜老弱丁壯於內旣自固其身家兼以制賊死命及今爲之亡羊補牢尙未甚晚若待深受荼毒再議補築經費更難措籌如果十里一寨賊至無所掠食其技漸窮或可剋期撲滅伏乞

皇上特頒訓諭諄飭地方官紳妥爲籌辦實力奉行於軍務大局裨益匪淺奉

旨嘉納又以行軍須急籌糧淮軍北援恐直隸地瘠民貧米珠薪桂不能籌給兵食奏請撥借津倉粳米二三萬石儲存河間大名保定等處以濟客軍並請

勅下直督嚴飭地方官豫提公款購存糧草蕞料儲備各營給價取用

詔并行之時直境戒嚴淮軍皆疲乏不堪而

中旨以赴援不力屢見詰責公乃上疏畧陳曰查臣軍自入東剿

捻以來任賴等股約十萬眾肆擾東境凶焰鴟張臣每念此賊不平則中原之禍靡有已時卽西北之憂亦未有艾而滅賊大計要必於冬春之交乘其饑困併力殄除故於運黃兩防布置穩固後卽選將併兵與之角逐嚴督諸將剋日圖功諸軍耐凍忍饑日馳百數十里始棄輜重後并鍋帳而棄之各裹乾糧日夜奔逐用能仰託

威福倖立寸功自壽光大捷以後餘賊全趨海贛下走淮揚東境已無賊蹤東軍亦早回防休息而臣軍仍乘勝南下直追至揚州分至安徽之盱眙五河等處生擒巨獠殄平餘

孽年底始克蕝事劉銘傳善慶溫德勒克西於十二月十五六等日分起馳回邳州灘上老營潘鼎新郭松林楊鼎勛諸軍於十二月二十九三十正月初二三等日先後回至濟甯老營解甲暫息臣親加拊視各士卒皆手胼足胝衣履不全疲憊不堪馬匹倒斃大半迭經奏明有案仰荷聖慈准暫予休息合營感戴

皇仁皆歡呼雷動劉銘傳三年轉戰勞苦尤甚積受寒濕手足麻木瘡痂徧體不能乘騎臣因該提督素資得力囑其始終奮勉毋得偷安目擊其狼狽情形策勵之餘實深矜憫臣

以剿辦東捻爲已責初不料西捻張總愚一股由山右直趨河朔又肆蔓延慮事之疏咎無可辭先奉

諭旨准劉銘傳將所部稍爲休養整頓正月初旬迭奉

諭旨催令劉銘傳善慶等赴河北進剿臣卽嚴飭各營趕緊汰去

病弱添補缺額製辦衣履整備鞍馬不准刻延向來游擊之師疲勞已甚須休養整練兩三月然後可用今尙未及兩旬也各營向以火器制勝子藥槍礮軍裝均須配帶自去冬輕騎逐賊鍋帳輜重沿途拋棄寄頓今奉調遠征必應逐漸收集并令添補又糧台分設徐州清江領給餉銀

往來千里動需時日軍中事件繁瑣有一不給難以遠行
若倉猝登程徒有赴援之名必難責赴援之效臣深悉兵
艱催令起程亦不能不畧待齊備將領各知大義既入援
畿輔斷不敢有意逗留茲奉

諭旨知賊勢深入

畿疆臣聞信之餘五中欲裂恨不能奮飛馳援稍紓

君父之急一切籌備各項亦無暇逐細經營除劉銘傳患病屬實
已乞

恩稍予養息暫難成行外潘鼎新鼎宇全軍並善慶溫德勒克

西馬隊已於正月十六日拔營飭令兼程由東阿德景進發唐仁廉馬勇於十八日跟蹤北上郭松林楊鼎勛武毅助字等營陸續進發臣俟周盛波所部由徐州調到擬於二十日親督啟行山東入直查剿捻非馬步大隊不能得力直境地勢平曠尤須用眾臣軍強弩之末遷地弗良事機所值敢稍推諉但冀沿途地方官能爲預備芻糧俾無缺乏必當視賊所向繞由東北向西南攔剿聯絡諸軍或犄或角共維大局疏入報聞時各軍分起援直潘鼎新督率所部於正月十九日由東阿渡黃善慶溫德勒克西於

二十日渡黃唐仁廉馬勇於二十一日渡黃相繼北發潘鼎新於二十日馳抵德州探聞賊由保定南竄饒陽恐其久踞肆擾或東竄河間天津大局攸關因督隊倍道遄征二十一日過直隸景州二十二日抵阜城卽改由獻縣西境徑趨饒陽公慮鼎軍兵力單弱飛飭善慶溫德勒克西唐仁廉等馬隊速進會合鼎軍兜擊並一面飭催楊鼎勛郭松林等軍陸續北渡公亦卽督隊啟程時東軍王心安在饒陽爲賊所挫賊旋陷祁州饒陽獻縣勢張甚適鼎軍追及二十四日敗賊於饒陽城東賊遂竄深州一帶公因

建言逆氛正熾各軍須穩慎進戰前截後剿此擊彼應先得一二勝仗再厚集其勢與之角逐卽可就地殲除若以無制之師單弱之衆輕爲嘗試挫敗旣易賊氣立張故兵家慎言戰以戰而必不勝不如不戰之養威重矣又以直境地勢平曠無險可阻我軍旣雲集東北賊勢將南趨若循舊路回竄彰衛或乘虛東擾臨清東昌卽可就懷慶衛輝之閒北阻太行南逼黃河設法圈制倘令晉陝各嚴扼澤潞山路各軍再由東北節節兜剿或分紮漳衛各河或進扼沁河促之一隅或冀收聚殲之效事雖未果行而防

河之議卽由此而起

二月公督盛軍進駐德州潘鼎新善慶駐守保定郭松林楊鼎勳率師進剿公之自濟甯北渡也本欲俟周盛波一軍北來取濟而行乃至正月二十日盛軍猶不至公乃自帶小隊先行由東阿渡黃時各軍造次進援糧臺猶遠在徐州清江各軍後路糧餉軍火轉輸頗難公乃議張秋設立轉運局以通南北餉道行過張秋順道至運河口察看形勢飭員籌挑黃運交匯淤阻之處以通舟楫適周盛波先令其弟盛傳率部踵至公遂督之以行二十日抵東

昌時雨雪載途泥淖甚深而擒賊由高陽東竄河間陷踞
獻縣邊馬擾及交河富莊驛一帶景德均戒嚴公乃於二
月初七日自東昌督隊趨行初十日至德州郭松林楊鼎
勛皆率軍來會謀報賊被官軍由北兇擊初六七日卽竄
擾衡水縣境遇漳沱水漲不得渡初八日北竄深州王家
井等處公以德州距深州僅二百餘里擒極飄猾趨向無
定德景爲

京津要路而德州濱運河轉輸差便遂飭楊鼎勛郭松林整
隊由景阜進而自統盛軍駐焉潘鼎新善慶等軍於正月

二十九日追賊至保定直督奏派在北路堵遏遂駐守保定西之大汲店於是公部北援者郭松林楊鼎勛爲一大枝潘鼎新善慶爲一枝自鼎軍及善慶馬隊扼紮保定而武毅勛字兩軍進剿前敵隨公駐防德州者僅盛軍馬步十一營矣東撫丁公親統王心安七營駐防河間楊飛熊八營駐防任邱莫組紳十營出剿而

朝廷猶以賊勢將逼津南并

詔公進防天津河間一帶公以河間一帶既有東軍大枝扼紮賊勢現趨西南河間情形較鬆似不須兩軍並紮致多糜費

且賊蹤飄忽瞬息百變祇當揀派大枝勁旅敢戰宿將與之隨地兜逐相勢剿辦不能取決於數十百里之外致誤機宜前在山東辦任賴等股只籌選將練兵不管臨敵調度故諸將皆無所牽掣得以放手剿辦致底成功且捻賊無攻城奪寨伎倆故城寨易防而平原難防凡城池失陷必其城已倒坍或無壯丁可守也平原四達只能守城寨城寨之外不能禁大股之不衝突馬賊之不游駛惟大山大水可以扼之直境四望寬平除漳沱滏陽衛運各河西淀東淀一帶可以設守但兵少亦不足濟事此外則有剿

法無堵法其言防言堵者皆有虛聲而無實濟者也必令
進防河間天津應卽調回郭松林楊鼎勳等勿庸進剿帶
赴東北妥籌布扼東軍亦可卽回本境分防德州臨清等
處云云

詔仍督公率郭松林等軍迅速前進並着催周盛波等軍北上以
厚兵力時捻蹤麇集

特旨左公宗棠總統各軍剿賊復

命恭親王節制各路統兵大臣及各督撫

二月十六日郭松林楊鼎勳破賊安平城下公進屯景州

時賊盤旋深州衡水之交郭松林楊鼎勛率隊由景州武邑西進兜剿兩軍整頓隊伍輜重於十四日會同前敵營務處段芾帶隊進駐景州之龍華鎮諜知賊又由省南下竄安平十五日由武強小範鎮渡河十六日行九十餘里將抵安平城下忽見塵沙蔽天賊騎皆從西北迎捲而來松林等派馬隊迎擊急調後路步隊策應易用剛吳鳳柱胡連發等進戰賊眾屢卻屢前小有擒斬步賊復從後突至我軍馬隊不利松林鼎勛亟令李長樂宋德鴻高占彪唐宏成吳雲集等各督步隊馳援槍矛相夾鏖戰三時

之久人馬蹴塵土周三十里我軍勢合猛擊縱橫盪決斃賊甚眾賊初死拒鼎勛等又派馬隊抄出賊後張逆腹背受敵遂大潰敗我軍追殺至三鼓始收隊是役也陣斃悍賊千餘名生擒五百餘名奪獲騾馬器械無數我軍陣亡總兵銜副將尹昌景副將龔興祖均議卹是夜賊乘我軍疲困欲繞道竄逸松林等預防之先派隊四路游徼夜四鼓大霧於迷濛中見賊掩旗潛向南遁松林等急督隊追之賊騎四散至饒陽之楊家村賊見追急乃復回拒我軍環而攻之撲尸載道賊酋張志清劉琅夏以仁領數百騎

乞降餘眾紛紛向東南敗走又躡追二十餘里劉松山郭
寶昌張曜宋慶程文炳等各以師來會松林鼎勛與約各
選精銳四路跟蹤兜截又以輜重累墜令軍士裹糧輜重
帳篷鑼鍋另派騎運送皆資輕裝追擊賊見我軍之銳進
且四路兜集也遂於十八日折竄饒陽武毅軍又迎擊之
賊望風而遁仍繞回東南由獻縣武邑復踞深州交界之
留楚鎮公諜知賊爲各軍追急而武衡一帶虛無一兵慮
敗匪東竄由武衡犯滄青則津郡又警乃令盛傳挑帶八
成行隊進紮武強之小範口鎮爲郭松林等援應並遮蔽

東竄之路而自移屯景州調度諸軍又以湖北宜昌鎮總兵黃中元帶湘勇兩營兵力極單卽并歸楊鼎勛統帶而飭黃中元赴任士默特官兵有叅領烏圖納遜等二十四員名在營隨剿公以其從征年久且東捻已剿辦歲事遂爲奏撤回旗焉

二月二十三日郭松林等與豫軍秦軍剿賊饒陽境襲斬偽懷王邱德才偽幼沃王張五孩等賊大敗二十八日出鉅鹿礮州境內逃走安平之捷賊旣東竄又爲劉松山郭寶昌喜昌程文炳與豫軍張曜宋慶等軍四面兜殺走

逸無路十九日郭松林楊鼎勛整隊要之於深州時賊爲豫軍所敗向南奔竄復橫折而北將及深州之東北李家村與我軍遇騎賊團結爲十餘陣紛紛抵拒鼎勛等以馬隊衝陣馳突而以步軍爲援應賊陣爲馬隊所衝稍卻松林親督李長樂宋德鴻蔡國祥高占彪唐宏成吳雲集等步隊又從旁要擊之賊團陣皆散我軍馬步齊進槍擊矛刺無虛發者斃賊千餘生擒數百奪獲騾馬無數張逆率步賊先遁而以騎賊殿猶相支梧我軍乘勝排壓追十數里賊之有騎者皆縱馬狂奔其步賊獮薶殆盡張曜宋慶

追軍亦至賊遂東南竄欲由武邑之圈頭過河適公先派小隊紮堵圈頭橋聯絡民團協守賊偵有備二十日以後復由深州西竄晉州界二十一日郭松林等馬隊遇賊於范家村又獲一捷收降鄧新樂等一百餘騎張曜宋慶馳至晉州西北攔剿賊復折竄東南二十二日近武強之小範河口欲渡公先派盛軍督本地團勇折毀河橋賊不能越二十三日折由饒陽逕奔肅甯松林鼎助及張曜宋慶皆急馳百餘里抄出賊前諜知是夜賊踞饒陽東北元城一帶遂知會劉松山郭寶昌等各軍齊進乘夜兜襲二鼓

後行近賊巢直前猛撲村旁零星散賊已先爲我軍駢戮其大股屯踞村莊數日奔馳疲敝皆相倚臥刁斗不鳴我軍乘利而入立將僞懷王邱得才僞幼沃王張五孩所踞兩大莊同時攻燬斬斃無算邱逆一股斬除殆盡張總愚另踞一莊糾黨迎拒我軍四路齊進草薶禽戮伏屍遍地賊始亡命狂奔其下馬拒戰之賊皆不及騎而走生擒悍匪二百餘名賊目張立堂蘇付恩陳小奎與焉奪獲騾馬二千餘匹旗幟器械無數賊勢由此而衰矣二十四日敗逆由安平竄深澤二十五日竄晉州二十七日辰刻在晉

州藁城交界之樓上村隄師溝等處偷渡滹沱河松林鼎
勛與劉松山張曜宋慶各軍先後追至賊惶迫而渡多淹
斃者其未渡之賊爲官軍盡數截殺已渡者猶存馬賊數
千人向南竄逸松林鼎勛派馬隊追之午刻及賊賊偵我
軍之疲於奔馳也乃蓄勢衝突我軍吳鳳柱胡連發等率
洋槍隊采擊賊皆亡命屢卻屢進相持兩時許松林鼎勛
復令胡良作湯得上尹長林陸懷邦夏青雲合力兜圍短
兵接刀矛盪決賊乃大潰我軍乘勝追殺二十餘里調集
步隊蟬聯繼進復追三十餘里直抵趙州境沿途共斬獲

千餘級奪獲騾馬無數二十八日賊由鉅鹿縣屬之官亭五陳等村向西南磁州一帶逸去

三月初十日公由冀州進駐大名十二日郭松林等截剿捻賊於滑縣之大伾山破之賊回延津 公之駐景州也

本以賊蹤盤旋深衡之交恐其竄擾景德乃賊股屢爲我軍挫衄知公親駐東路不敢迂視乘隙西走潛渡滹沱向南疾逸公遂於三月初二日督隊自景州向冀州前進初四日行次冀州賊竄入豫省之臨漳渡漳水由衛輝新鄉一帶西竄獲嘉修武爲豫軍扼剿復折而東趨原武陽武

公以賊已入豫境大名與濮范滑濬毘連可以居中控制
藉固

畿疆門戶乃於初十日移駐大名又以賊警在南公所部兵
力甚單卽奏請飭催潘鼎新善慶等各隊倍道南下俾資
調派

詔如公請賊之南走本以直境官軍四集此截彼迫不得喘息恃
其騎疾於渡滹沱河後卽悉力竄擾豫境

朝廷急圖剪滅督促諸統帥蹙之豫境爲一鼓殲擒之計乃賊
偵我軍已追逐出直卽復回竄於初十日掠延津而北漸

近直東公知賊謀之狡恐其乘虛復竄

畿輔乃飛飭松林鼎勛自彰德赴滑縣攔剿公親督師由大名前進乃賊騎颺疾如風不一日已由滑縣向東北奔竄擾及直隸開州邊境公時抵南樂卽由清豐馳赴開州整軍待之松林等軍於十二日先抵滑縣城西劉松山郭寶昌張曜宋慶均尾賊後松林等慮賊追急入直是夜三鼓後唧枚疾走折由濬縣境繞出東北橫截之行四十餘里次大伾山天甫將曙有賊馬千百連綴而行由東南向北不虞我軍之繞截其前也忽見旂幟悉驚松林親率胡良

作馬隊飛騎衝入易用剛吳鳳柱分督各營排列馳進賊亦整隊迎鬪槍矛相接衝突逾時兩軍猶交綏吳鳳柱易用剛乃躍馬陷陣周麾而呼弁勇無不踴躍當者輒靡賊陣始動蔡國祥宋德鴻李長樂陳飛熊等亦各帶步隊乘勝盪擊賊眾大奔踐踏及槍矛傷者撲道相望忽有悍酋執大旗揮扎刀率眾返鬪前軍頗有傷失乃列槍隊攢刺之其眾亦潰鼎勛督隊山大伾山左突出橫截賊且奔且戰胡連發徐邦道合力邀擊高占彪吳雲集督隊策應賊眾逼山而陣皆下馬搏戰是時鎗礮無可施皆以刀矛相

擊撥刺有聲約兩時許我軍中有習大札刀者當酣戰時奮呼直前一悍酋中刀立斃各兵謹譟賊乃驚逸鼎勛復督步隊排放連環鎗礮斃賊甚眾賊烏獸散不復成伍松林鼎勛兩軍併力猛追四十餘里生擒悍酋常虎兒張裕寬朱元青李玉名等十餘人并老賊數百名陣斬無算級獲騾馬千餘匹是日公甫抵開州派隊向西南搜捕策應賊遂回竄延津封邱一帶此次賊竄延津本欲乘虛由開州走大名東昌以圖北擾不料淮軍追截受創南還公知賊情極狡其北犯之心必不卽止乃計由豫入直爲東西

兩路西則出淇縣湯陰赴彰德東則出延津滑濬赴開州
時左公由彰德進正當西公乃自請暫駐開州以當東路
報可大伾山之戰我軍陣亡記名總兵胡家讓副將銜叅
將夏得勝游擊周得意羅清瑞四員并請

優卹如例

三月二十日賊由延津東北竄我軍扼之滑縣不利陳振
邦受矛傷旋歿賊東竄莘縣東昌山東昌渡運 賊渡漣
沱之時僅數千騎自竄豫後沿途擄脅黨羽復眾摩盪衛
輝延津間實欲乘隙北犯郭松林楊鼎勛仍赴滑縣迎剿

潘鼎新善慶溫德勒克西亦由內黃至滑乃會議以自滑至長垣地勢平曠騎賊眾且悍此擊彼竄無可攔制建議就衛河以東黃河以西連營排紮先扼竄路再圖進剿請公緘商左統帥及豫撫正籌布置間賊已突至十九日從封邱北趨長垣鼎新率隊攔遏賊乃乘夜折竄滑境二十日黎明賊全股來犯鼎勛派徐邦道胡連發以馬隊迎擊擒斬數十名賊忽退數里其時賊未受創遽退鼎勛知有異乃嚴陣以待不逾時賊果率大股回犯步賊皆持矛結數十團陣滾隊而前馬賊翼抄我軍後胡連發奮勇直前

矛傷左臂血溢襟袖猶裹創力戰鼎勛復率高占彪吳雲
集唐宏成分路策應槍礮周擊鏖戰兩時許賊眾且却且
前吳雲集大呼陷陣手刃悍酋數名賊急奪路向東北疾
走郭松林分紮長滑之交是日辰刻得報知賊由滑南竄
立率所部馳往策應公從開州派唐仁廉陳振邦馬隊赴
滑協剿亦至遇賊於大河村唐仁廉首先衝陣斃賊多名
賊騎從兩邊抄下陳振邦繼進復斬悍賊二十餘名賊佯
退却未幾全股回撲陳振邦鼓勇進戰奪馬三十餘匹賊
以悍騎四面包裹陳振邦深入賊中爲賊槍刺咽喉傷甚

正危急間松林督隊馳至飭宋德鴻陳飛熊李長樂等步隊縱橫擊刺賊墜馬甚眾易用剛吳鳳柱各縱騎從兩旁抄殺賊乃解圍東北竄鼎新善慶等旋自長垣追至與松林鼎勛會合痛追是日同抵濬縣賊由濬縣內黃交界圖渡衛河二十一日鼎新善慶等擊走之公復飭周盛傳吳長慶等由開州帶隊襲剿二十二日我軍行抵內黃之七級見賊由西南向東北馳走卽率所部攔擊賊騎猛撲我軍步隊一擁而進炸礮火箭連環轟擊賊敗馬隊乘勢抄擊賊仍向東路竄去生擒賊目許善王坤杜秋等十數名

賊沿河竄向內黃鼎新善慶溫德勒克西追過城北二十餘里是役也記名提督陳振邦身受重傷旋歿狀聞奉

旨照提督陣亡例從優議卹於立功地方建立專祠其同日陣亡之仁營馬隊總兵銜副將劉正同游擊銜都司魯朝斌銘營馬隊守備高峻嶺均

優卹如例是時賊循衛河北竄而善慶溫德勒克西馬隊緊躡於後乃於內黃之五龍口試淺偷渡馬隊進遏之賊見我步軍尙遠遂揮馬賊數十團散轡齊上悉力迎拒並分股繞出陣後層密包裹愈戰愈緊善慶等各率部分拒頗有

斬獲鼎新松林督馬隊馳援而令武毅勳鼎各步隊接應
善慶溫德勒克西知有援軍從圍中突出賊腹背受敵大
敗降其偽天將熊大海騎賊百餘人賊舍我軍復趨東北
二十三日犯南樂清豐之交周盛傳吳長慶督隊追及陶
保村外擊斃馬賊數十名奪騾馬百餘匹生擒賊目徐老
滑等數十名追二十餘里至南樂縣東遇賊大隊回撲周
盛傳率馬隊迎剿賊騎萬餘併力冲壓周盛傳將馬隊繼
依步隊進戰賊見我軍馬步齊至悍賊數千下馬持矛鋒
擁死鬪營官賈起勝衛汝貴汪炳炎葉志超楊岐珍馬朝

選奮勇迎擊賊勢稍却馬朝選受矛傷數處喋血而戰朱
冠軍復帶開花劈山礮連環轟擊自未至申廛戰兩時之
久賊潰走我軍乘勝掩殺屍橫溝渠皆滿計斃悍賊千餘
名當接仗正酣時賊分二千餘騎抄吳長慶各營後黃仕
林者貴分擊走之又斃賊曰張丑等數十名賊星夜奔山
東華縣境內鼎新松林鼎勛會商賊若得喘息卽恐乘隙
渡衛遂循河窮追二十五日賊奔東昌時滄州下窪高家
口梟匪高岩糾集鹽馬賊數千人投賊入夥卽引賊之前
股由東昌城南李海務渡運東趨我軍於午後追及之郭

松林善慶溫德勒克西等縱騎疾擊賊率悍黨逆戰易用
剛吳鳳柱排隊進壓賊用結團滾隊法冲我陣我軍聯紫
排隊不爲動徐邦道吳連發吉玉成各率馬隊潛從旁截
之賊之圍陣漸散我軍步隊排盪而入陣擒悍酋何士嘉
周久等數名斃老捻數百賊復奔潰是時賊雖屢敗而掠
馬甚眾步賊悉改爲騎日馳百數十里我軍躡追常苦不
及苟及矣偶一排隊賊卽奔避使我軍欲戰不得每接戰
其悍賊皆下馬確鬥我軍非馬步並進不能制勝而步隊
笨滯不能與騎軍並集又各軍旣以爭逐爲事輜重皆委

棄之甚至鑼鍋帳篷一切寄頓以利馳逐乃往往十餘日
兼程馳剿所贏之糧有限制所逐之賊無定向後路非無
轉運每苦不及兼之兵賊出入之地無糧可糴是以軍中
時時斷炊至有數十日以瓜豆野蔬充腹者步騎皆疲乏
不堪直東交界平曠千里賊任意盤旋我軍無險可扼騎
賊驟疾如風一瞬卽失公初意擬蹙之懷衛之間繼欲扼
之衛黃之交皆未及謀定而賊已竄逸軍情朝夕遷改移
步換形而

中朝責望嚴切公於此時動心忍性可知矣初賊竄豫時

朝廷命公總統各軍至是賊回竄直境又

詔疾赴景德一帶防剿更以追軍落賊後望吏議焉

淮軍平捻記卷九

四月初六日公自開州至於東昌建防守黃運蹙賊海東之議十二日進駐德州郭松林楊鼎勳潘鼎新邀擊賊於吳橋東光南皮滄州靜海天津皆破之賊不得西渡運河河防始固先是賊渡運東竄公飛飭郭松林楊鼎勳潘鼎新等倍道急馳繞由北路沿運河南向兜截以蔽津沽衝要公亦由開州赴東四月初六日公至東昌秦督左公率劉松山張曜宋慶程文炳之師由德州進景州公慮各軍追急賊折回南擾致我軍奔命不遑轉瞬復落賊後乃

緘商皖撫英公請督皖軍進駐臨清豫籌防扼旋奉

諭旨以定安等兵力單薄飭公迅督諸軍赴吳橋一帶扼要駐紮
以爲前敵諸軍調度公因疏陳曰目下賊勢駸駸北走臣
雖派大枝勁旅尅期前驅心繫

京畿憂惶莫釋惟有遵

旨遄行不遑顧及後路拜摺後卽督同周盛波吳長慶等營由東
昌起程馳赴德州吳橋等處扼紮就近相機調度冀補萬
一臣察捻逆久成流寇張總愚尤極狡猾頻年竄擾北地
擄馬最多平原曠野瞬息百里我軍步隊與爲躡追實苦

不及近來軍行日至百餘里爲用兵十數年來之變格然
軍士如此奮勉猶不能迅圖殄滅非力不能敵蓋勢不足
制之也窮年累月飢走疲憊徒勞我師誠恐一旦潰蹶難
支轉生意外之變臣不得已屢爲就地囹制之請迭商左
宗棠等擬設長圍以困之無如黃河以北平坦千里綱羅
難施由於地勢使然懷慶形勢最險賊竟不肯深入張逆
鑒於任賴等股之覆轍一聞圍紮立即死力衝突亦不容
我閒暇次第施工議者謂就運河一線設防蹙之海東一
隅較得地勢惟運河自天津至張秋黃河口計一千二百

里內張秋至臨清二百四十里年年黃水倒灌淤成平陸尤費兵力約須十餘萬人方可分布現計直東豫主客各軍僅及十萬臣慮其有守無戰潰決爲患左宗棠慮局勢疏廓難於有成皆係實情或又謂待賊回竄豫境分守漳衛河及張秋臨清運堤以蹙之費兵亦近十萬又恐偪賊入晉總之圍局不得猝成賊騎難禁紛竄卽嚴督諸軍日以追勦爲事能勝賊而未足以滅賊久且有疲師覆軍之憂可勝惴惴疏入

詔仍促公迅赴北路并令皖豫各軍統歸調度公冒雨督隊而進

十二日公至德州時郭松林楊鼎勳潘鼎新善慶諸軍之
追賊者由東境轉戰入直前月二十八日諜報賊由桂平
西北竄騎賊數十團隱伏樹林間松林先督王平西蔡國
祥宋德鴻李長樂等步隊進擊賊馬卽退列林外鼎新督
戴春林吳從發潘國揚各營鼎勳督高占彪吳雲集唐宏
成各營從兩旁合抄松林復調馬隊與善慶溫德勒克西
繼步隊接戰時步軍已挫賊鋒馬軍銳氣益奮往來馳擊
賊陣動旋避我軍馬步力追三十餘里至高唐州之雲家
村生擒賊目賈記張有得二名老捻數十名陣斬悍黨頗

衆賊倉皇北竄我軍復及之徒駭河邊奪馬尤夥二十九日追過平原賊急趨陵縣吳橋是夜四鼓各軍冒雨進追行未三十里與賊值善慶溫德勒克西唐仁廉及武毅鼎勦各馬隊奮而前騎賊挺長矛回鬪都司邱得功陷陣死之步軍各營急前策應鏖戰逾時賊棄陣而北時賊欲循吳橋就安陵連鎮兩處竄渡運河松林等會商以運防未定惟有繞出賊前攔擊庶可禁其搶渡乃各率所部夤夜驚抵吳橋賊聞我軍踵至迤東逸走四月初一日大雨如注諜知賊仍欲由東光偷渡運河各軍循河急追午後及

之賊復折回余家莊初二日賊從東光境內突犯運濱我軍攔擊賊敗竄南皮是夜賊酋鄧保正率二百餘騎來降初三日鼎新與各軍議以賊銳意北竄非繞前截擊不能過之使南雖霖雨載塗軍士怨苦有不暇恤遂循運河東岸徑指滄州適賊已至阻兩城南東軍王心安落後遇賊求救我軍乃迎賊設陣分四起合擊鼎新鼎勳兩軍先從左右兩路進松林督所部與爲應援善慶溫德勒克西唐仁廉直搗中堅賊騎縱橫數十圍整陣相拒松林令馬隊且前且卻誘之使近賊果率衆來撲我軍伺其逼也環鎗

排擊之煙火迷離之中步隊執長矛譟而進賊出不意爲鎗矛所傷墜馬者紛紛如撒豆賊退復陣鼎勳兩軍乘勝壓之乃大潰奪路東走夜竄由東而北我軍復躡擊之次於滄州之花園襲奪賊館數處收降張懷慶胡志等數百人初四日賊竄靜海追軍由唐官呂官兩屯以至陳官屯鼎勳乘夜襲擊賊目何祿誠等率七百餘騎來降初五日賊竄近天津松林等疾馳數十里抄前攔截傍晚抵天津分紮城外探知賊在楊柳青伐木結簾鼎新卽令張景春戴春林會同善慶溫德勒克西馳擊之賊又敗退初賊以

天津爲

畿省富區窺伺甚久自淮軍北來日夕爭逐未得乘勢肆其
吞噬於是竄豫以掣淮軍南下然後疾捲回犯津沽冀淮
軍不及援而後可以得志詎知淮軍於霖雨中忍饑與之
並趨而北抗鬪又不勝逆謀不遂而逆勢亦沮公於德州
上戰狀並爲武毅軍力戰陣亡之總兵銜副將郭文武例
貢生縣主簿郭士琳副將姚長庚會文益都司邱得功請
卹均得

旨如例

是月公具疏力主防運之議潘鼎新郭松林建守減河以爲滄青靜海屏蔽十九日防運分汛議成自黃河銅瓦廂之決由直隸東明長垣境內直趨大清河吐囁嘴入海其午貫運河之地則曰張秋鎮所謂黃運交匯也前東捻在黃河之南扼之河北運西以蹙之於海卒底大功今西捻在河北非嚴扼張秋不能合圍而張秋至臨清運河計二百四十餘里年年爲黃水倒灌積漸淤成平陸非引黃入運則運河無水公之北渡也於張秋鎮設立後路轉運局飭淮軍水師統帶提督徐道奎樹字營統帶張樹屏轉

運局委員知府萬年清挑潯淤沙引黃入運至是捻賊皆竄運東公遂力主防運之議以爲直東交界之地縱橫七八百里賊騎飄忽無從圍制欲趁東海南河形勢聚賊殲旃必須先扼西北運河聯築長牆方可絕其出路尤以東至津沽西至東昌張秋爲兩路鎖鑰而未至伏秋大汛黃水僅高尺餘未便啓壩旣不能以水爲險則設防全恃兵力公隨身僅盛軍數營旣欲扼勦陸路又欲兼顧河防力終未逮於是公乃馳檄各統將相度地勢妥籌萬全之法時賊自天津爲我軍扼截不得逞十一日由鹽山度雲東

南鎮海豐一帶十二日至武定十三日至商河十五日由
禹城荏平回甌高唐境潘鼎新郭松林自天津追賊南下
過滄州滄州南有捷地壩者在運河東岸當減河口以時
啓閉蓄泄濟運者也減河自捷地壩至海濱牧猪港計道
百餘里橫互東西水漲足限賊騎竄津之路是時漳衛上
游山水暴發運河陡長至一丈五六尺鼎新松林見運水
盛漲卽督軍士開捷地壩導運入減鼎新並飭地方官就
河北集練築牆以爲滄青靜海屏蔽公卽檄鼎新鼎勛駐
減河防守而令松林馳由德州赴東昌相機嚴扼公又慮

重兵均在前路恐賊乘虛回擾乃奏請飛

飭豫撫嚴防內黃滑濬一帶及下直督轉飭大順廣道將衛河南岸船隻提歸北岸

詔從之未幾潘鼎新楊鼎勳築減河長牆八十餘里告成減河水深丈餘鼎新等兩軍扼守甚嚴自是天津無犬吠之警於是東皖淮軍議分運防汛地十九日議定自東昌城南至張秋河口淮軍郭松林吳長慶兩軍守之自東昌以北至臨清東皖各營分守之均剋期築牆扼紮直隸境內運防則直軍等各任其責時徐道奎等挑濬張秋運河功適竣

而黃水大至道奎等開壩引黃入運公又調楚軍丁長春
水師由張秋臨清駛入德州運河圍制之策於是乎成初
劉銘傳之以病乞假也請期三月是時假期已滿

詔公飭催迅赴北路勦賊公因覆奏曰劉銘傳與臣生同鄉里少
負不羈之材血性忠勇智略明達近時武將中實所罕見
蘇省肅清非臣之功劉銘傳與程學啟之功爲多任賴捻
股蔓延數省幸而殄滅亦非臣之功劉銘傳一人之功也
追逐三年疲憊實甚迨東捻全股撲滅劉銘傳乞退更切
其時通西捻出竄將及河朔迭奉

諭旨令該提督統兵協勦該提督久勞致病骸腫不能乘騎係屬
實情臣不敢遽爲代請開缺但請假三月俾得靜以調養
並將所部銘軍委該軍營務處道員丁壽昌暫行代理駐
防邳州認真操練以待劉銘傳假滿視師三月間臣因捻
勢日猖已兩次手書諄催來營襄助現聞督臣曾國藩亦
爲懇切函催茲迭奉

恩諭又經恭錄檄行惟恐驛遞梗阻該提督或藉病遷延致誤師
期現在營中生擒賊黨皆供稱張逆惟恐劉銘傳復出時
時探問微臣文弱辦賊之才自愧弗如可否仰蒙

恩旨令劉銘傳總統前敵馬步各軍飛飭兩江督臣曾國藩署安徽撫臣吳坤修就近催令迅速統軍北上與臣等共籌滅賊之方該提督通習書史素明大義諒無不急難赴公自干清議也

詔皆如公請

閏四月初八日賊竄東光下口搶渡運河水師丁長春擊退之又窺連鎮知有備退竄陵縣周盛波盛傳擊破之楊鼎勳等守減河公慮賊股回撲親率周盛波行隊於二十四日由德州沿運東北行察勘形勢賊果撲減河牆二

十一日戌刻突至河南岸盤踞民村三鼓時直犯河牆善
慶溫德勒克西暨吉玉成徐邦道等率兵嚴堵橋口潘鼎
新飛飭張景春潘國楊等馳往援應鼎勦亦派隊由白兔
過河兜擊相拒一晝夜次日黎明賊見防兵嚴整不可動
去之而竄秦督左公率湘軍劉松山豫軍張曜宋慶蹤至
邀擊敗之賊由鹽山遁走時減河上游水勢尚旺而下游
自呂橋東至海口數十里河身淤塞一片漫灘由鹽山小
徑即可繞入公於二十六日馳抵滄州督鼎新鼎勦等派
勇逐節挑潰直抵海濱減河之防無瑕可圖自比捻股竄

津無路出運不能盤旋高唐禹城臨邑之間不百日而全股殄滅防守之策得也閏月初一日公回德州飭周盛波帶銘營先鋒馬隊周盛傳帶盛軍步隊由德州赴陵縣截勦初三日兩軍至陵縣東夜見賊火遂催兵東進行二十里至鳳凰店遇賊馬往來游駛其大股尙在五里以外我軍馬步結陣齊進直搗中堅賊衆突見官軍不戰而潰我軍馬隊躡之斬賊百餘名獲馬六十餘匹奪回賊踞村莊二十餘處追至何家莊張逆突驅騎賊大股結十餘團陣回撲我軍迎擊時賊勢實已窮蹙不敢戰復向東路絕剗

而奔零騎分路折竄又遇劉松山張曜宋慶程文炳各軍紛紛散走由東北趨正東軍中謀言張逆知圍已合力不支黨衆離散欲死中求生引官軍至海隅疾竄西北撲運搶渡盛波盛傳知其語信乃改由寧津向吳橋西南截擊兼爲德州屏蔽初六日賊過海豐東北四十餘里果折而西行沿途逆黨紛紛出降初七日賊酋高老步韓錦生率四百餘人降劉松山周老鳳率七十餘人降張曜張逆下令諸賊各帶門板繩索向東光下口一帶槍撲運河適公先派楚軍水師總兵丁長春赴下游巡防是日帶礮船駛

抵下口日方午陸軍亦躡追而至賊正運木板赴河紮筏
水陸各軍分路奮擊賊狂奔繞東光城而走有騎賊數十
竄至馬頭河邊水師復擊散之向南奔竄又於連鎮一帶
窺伺公調提督徐道奎水師由德州亦至連鎮賊知有備
初九日繞由吳橋德州界內南走陵縣盛波盛傳驚追之
申刻及賊尾隊於陵縣西二十里之土橋賊以精騎二三
千回拒盛波督馬隊與搏戰適步隊亦至合力併擊賊大
奔潰擒殺百餘人奪獲馬數百匹賊竄平原荏平高唐境
內盛波等乘勝逐勦是時賊中無一步隊人倅馬三四倭

忽易騎疾走速於烟電與官軍遇絕不戀戰我軍馬隊不如騎賊之多追亦往往難及

五月十三潘鼎新破賊於臨邑公令諸軍進扼馬頰河賊使不得騁運河減河之守賊騎已有限制然運東地勢平曠縱橫七百里我軍步隊躡追不能速進馬隊又少於賊騎雖於閏月中屢爲各軍挫敗而乘暑追逐軍中疲病繁興五月初四五日公乃飭郭松林潘鼎新等暫駐陵縣臨邑一帶居中防扼於是賊由武定陽信海豐等處北竄劉松山郭運昌喜昌由鹽山迎勦張曜宋慶春壽山樂

陵截擊迭敗之復西南竄公又飛飭吳長慶赴吳橋攔截郭松林由陵縣要擊賊馳走無路於十三日晚至臨邑城東北十餘里各村踞宿鼎新駐兵於此聞報乃乘夜掩襲之賊連日夜狂奔疲乏皆入村酣臥夜二鼓我軍潛搗其巢遂將卞家廟各村踞賊張逆心腹悍酋張宗先一股駢戮淨盡奪獲騾馬六百餘匹生擒數十百名公以運東平曠扼守各河雖能制賊不流而難得其死命且久晴之後運河日涸西岸民團協守未可深恃鋌而走險防不勝防議欲趁黃水盛漲縮地圖紮以運防爲外圈而就恩縣夏

津高唐之馬頰河截長補短劃爲裏圍偏賊之計乃商請
東撫檄飭恩夏清平各屬官紳號召民團就馬頰西北崖
聯紮長牆又飭郭松林潘鼎新周盛波等督率弁勇由臨
邑陵縣築牆挑濠與馬頰河民牆相接時張逆以追軍四
集無路求生欲料死黨由臨清以北故城以南乘虛窺運
公商調新到皖軍張得勝漕軍張從龍等兩枝就近赴馬
頰河南岸清平高唐一帶扼紮遮護西北運防於是賊窺
之地日益蹙

五月二十五日郭松林敗賊於海豐二十七日賊窺吳橋

犯周盛波盛傳之軍盛波等設伏狙擊大破之又掩之於
場丁莊斬張逆姪張三彪 公之令松林等進紮馬頰河
也由臨邑陵縣聯紮牆壕至恩縣德州境內與馬頰河民
牆相接而留臨邑南至濟陽黃河濱將及百里誘賊回竄
西南一隅再行就地圍紮賊狡數多揣知有異甫竄濟陽
十五日卽由濟陽折趨東北賊情飄忽前敵諸軍不能扼
公慮賊竄出長牆時候補鴻臚寺少卿袁保恒奉

旨交公差遣公檄充馬步全軍翼長令馳赴前敵相機籌辦鼎新
盛波等所紮牆壕工已蒞酌留隊伍於長牆適中處立老

營坐守而選精銳馬步進剿盛波盛傳並帶八成行隊進駐吳橋寧津交界以備賊回撲運河二十四日賊由海豐南竄濱州爲張曜軍所敗由陽信復回海豐郭松林帶隊行抵樂陵副都統春壽亦率馬隊來會相約進師二十五日辰刻及賊於海豐之郝家寨春壽先以騎兵嘗之賊四面圍裏春壽軍不能敵松林聞報飛飭馬步隊馳援分兵爲三路唐仁廉朱德鴻由右進胡良作李長樂蔡國祥由左進松林自率親兵與楊西平步隊由中路進賊見淮軍四集勢已沮我軍三路並進截賊數處不得合春壽亦破

圍出賊腹背受敵紛紜敗逃各軍分隊追擊忽雷雨大作
收軍駐慶雲之余家店是日之役春壽馬隊頗有傷亡顧
亦擒悍賊數百名松林一軍生擒著名賊酋周老廣兄弟
及大小賊目數十名賊黨八百餘名陣斬千餘級奪獲騾
馬二千餘匹旂幟矛械無算二十六日松林督軍急進約
馳四十里許遇賊憩村落中見兵至驚走殺不及騎者二
十餘名逐北三十里賊急反戈列陣以待松林整隊碾壓
兩軍未交賊復自驚潰遁我軍乘勢掩殺斃老擒六十餘
名生擒五十餘名獲騾馬百餘匹賊大創乃奪路急奔二

十七日由樂陵繞出寧津吳橋間折向西南急馳百五十里於申酉之交由吳橋之范屯鉤店突犯盛軍駐營之毛家莊一帶盛波偵賊至卽令步隊伏密箐中以馬隊分三路箕張誘賊盛波所率步隊亦分數起伏馬隊左右賊初避勦奪路急奔不虞反入我腹地賊騎猶兩萬餘知陷危殆咸奮鬪勢甚張盛波歛軍避其銳揮馬隊少退以示弱賊果猛進我軍馬隊皆下騎鏖戰步隊伏軍四起槍礮雷發斃人馬不可以數賊潰四散縱橫十餘里凡賊可窺之路皆我軍先已扼紮固而蹴之伏屍徧野得級數千驟馬

二千餘匹擒及降者三百人二鼓後敗賊散不能合一股向東回竄一股繞山陵德交界之劉家莊向西南竄踞離德州七十里之楊丁莊孫世官莊方家莊一帶盛傳窮追不捨夜三鼓逕進襲之盛波率馬隊爲援應馳二十餘里逕抵賊巢盛傳親帶小隊潛赴各莊偵察時賊困乏甚露宿林下楊丁莊賊尤多乃密令各營分四面進圍合然後鳴槍礮呼譟賊夢中驚起昏瞶亂竄爲刀斫矛刺及自相蹂踐死者十殲五六陣斬張逆之姪張三彪生擒股首李老懷及大小賊目賊婦幼孩數百名餘匿田隴秫苗中間

得脫其附近各莊盛傳派隊搜勦艾堆之餘零黨惶懼四散前後獲騾馬三千餘匹賊徒得脫者沿路或爲民案截殺或爲巡兵邏禽自此賊勢益不支捷聞提督楊正國

賞換達春巴圖魯總兵汪炳炎

賞給利勇巴圖魯副將宋冠軍固勇巴圖魯參將周行發揚勇巴圖魯游擊吳永紹果勇巴圖魯副將衛汝誠以總兵記名簡放其餘出力員弁

詔准彙案保獎陣亡之五品銜江蘇候補

縣黃振楚副將劉斌

游擊萬得勝都司龍得福均照例議卹

六月初七日郭松林潘鼎新敗賊於沙河擒首張總愚受
重傷而遁張逆因臨添築長壘窺地日蹙盤旋海豐
慶雲之交爲各軍所追日夕無停趾五月二十八日折竄
總平潘鼎新合善慶溫德勒克西馬隊蹣追而至抄前攔
擊日加午賊從西北來初勢甚銳我軍馬步分迎之賊被
鎗傷者甚衆俄敗走解家店奎合一帶我軍追殺數十里
而止二十九日賊窺商河之李家坊松林一軍追及之時
賊屢挫勢衰蹙然所餘盡張逆死黨兇悍老賊無不善騎
習戰松林深知其狀乃豫伏兵於秫叢中以親兵馬隊誘

致其師賊果回騎出撲伏起截殺百餘級餘衆狂奔惠民
一帶會薄暮松林令軍士飽餐乘夜追襲行三十里許賊
踞村莊眠怠松林令李長樂蔡國祚襲其左宋德鴻率右
後兩營襲其右松林自督楊平西及唐仁廉胡良作馬隊
爲後路援應三鼓賊困臥無警備各軍挺刃而前遇賊卽
斫賊整隊不及四散潰走立奪所踞村莊十餘處武定濱
湖地窪擒斬及落水陷泥者不可勝計衝賊爲二一竄正
北一竄東北松林於晨炊後卽督仁毅軍向正北追勦七
八十里抵樂陵之劉村沿途截殺生擒悍賊千餘名奪騾

馬三千餘匹收幼孩及解散脅從甚夥李長樂生擒張總
愚之姪張七張正江之弟張得華卽於陣前正法其竄東
北一股直張曜宋慶督隊由樂陵東進又肆獮雞松林仍
督隊追進六月初三日追至楊信之清豐鎮賊收散亡甫
合股屯集駐足未定聞我軍至奔而南初四日由武定之
杜家橋竄過徒駭河松林過河躡追賊竄濱州之李子鎮
時各鄉村鎮均奉公諭設立堡寨守望相助然第能守無
敢擊賊者賊過李子鎮鎮民以其衰也遽放炮擊之賊怒
攻寨俄頃松林率兵追至賊遙見旗幟皇遽棄寨走追斬

獲數百名賊竄西北我軍追至夏家橋潘鼎新亦由陽信
追至初五日合軍進剿已刻及賊於馬店迤南賊窘迫回
拒鼎軍馬隊滕副武率三營迎擊步隊吳從發潘國揚張
景春繼之松林督唐仁廉胡良作馬隊從左路抄賊後李
長樂宋德鴻蔡國祥步隊繼之首尾夾奮賊初聯數十騎
爲一團陣人背倚馬尾接其數十百團陣與我軍相抗我
軍深入破其數十團餘駭散因大奔潰拋棄騾馬婦女器
械以綴我軍松林鼎新嚴戒軍士不得回顧疾追四十里
至商河東北之千家圩盛暑烈日炎蒸人馬困乏暫就樹

林憩息賊稔我疲乘間回撲胡良作馬隊大呼奮起擊之
生擒悍逆百餘名各軍乘勢合進又斃賊千餘天晚收隊
賊黨見我軍之整知不可敵賊目陳信元乘夜率騎來降
鼎新撫之初六日大雨竟日駐軍房家寨賊踞沙河左近
初七日黎明雨尙未止松林與鼎新議乘雨潛師襲賊不
備鼓軍士列陣而進行十餘里過沙河賊方起隊欲走行
列未定見我軍突至驚松林截其前鼎新襲其後泥淖載
塗賊騎不能勝爲我軍所乘亡命死拒我軍馬步連環迭
進無不一以當百鎗丸如雨而下呼聲雷動賊大衄我軍

乘勢壓追直抵商河城下自沙河至商河三十里沿途伏
屍顛趾相接當戰酣時張逆總勳親率黑旗隊衝陣中鎗
落馬數十騎翼之而逃羣賊因之紛潰是役也陣斃約二
三千人生擒千餘人竄匿樹叢及林間爲餘兵搜殺者又
不知凡幾其大股脫逃者尙五千餘騎翼長袁保恒奉公
命至臨邑督率各軍亦派馬哨於沿途擊擒數十人張逆
之表姪張三老鳳陣斃馬我軍松林所部馬隊統領記名
提督胡良作鼎新所部步隊統領記名提督潘國揚均受
重傷賊襍獲敗遁濟陽東北黃河之邇家渡龍王廟一帶

捷

聞胡良作唐仁廉照一等軍功從優議叙提督潘國揚總兵李長樂吳從發張景春交軍機處另行存記遇有提督總兵缺出儘先

簡放時大雨連旬六月初一日以後黃河伏汛陡長長江水師提督黃翼升淮陽總兵歐陽利見漕標記名提督姚廣武等各督所部炮船由張秋乘漲進口初十十一等日駛入德州運河北路運防得此水師勁兵防務益固而徒駭等河水勢日盛濟陽一帶大水漫溢成片平地水深二三尺

賊擇地形稍高者踞之公嚴檄諸軍乘水進攻翼長袁保
恒與郭松林潘鼎新吳長慶商定會合豫東皖各軍由徒
駭河北岸覓渡而前蹙之水濱爲一鼓聚殲之計於是劉
銘傳自皖籍來德州公檄今統帶原部銘軍馬步隊馳赴
前敵相機督戰當

詔催銘傳之赴軍前也銘傳正患腿瘡大發寸步難移嗣調泊稍
痊於五月十六日自皖力疾就道六月初八日行抵東昌
老營聞我軍屢獲大捷賊勢窮蹙旋謁公德州力辭出勦
不敢取巧攘功公宣

朝旨慰勉檄令迅赴前敵會合各軍以作士氣檄行復奏陳焉